

※書目文獻※

袁績懋詩集輯校（下）

林玫儀*

鋤蘭蕪草卷三

北平袁績懋厚安

◆207-208〈盛事〉

鷓鴣立仙洲，彬然煥毛羽。天寒鮮稻粱，飢翻倦難舉。微生幸自給，詎足供刀俎。誰家挾彈兒，一發黃間弩。文采雖足珍，瘡痍已難補。曲港暮潮通，雲深任容與。努力且高飛，何愁雨風阻。(3-1a-001)

雛鳳構新巢，鸞鶴噤不鳴。浮雲暖長空，鷓鴣忽有聲。幽蘭正揚揚，無風自飄零。不惜芳華落，所嗟白日傾。嶢嶢本易缺，察察難為明。松柏委霜雪，勁節彌堅貞。空谷守吾素，澹然何所營。(3-1a-002)

◆209〈墨〉

昔日隃糜墨，龍墀煥寶光。風乾偏失色，塵洩尚生香。判牘才真小，揮毫興自狂。松滋休棄擲，眉史助新妝。(3-1b-003)

◆210〈急雨步芙江原韻〉

雨聲如突騎，凌厲勢無前。鯨跋三山浪，龍耕百道煙。癡雲團濕絮，密樹挂流泉。風定晴光轉，依稀噪晚蟬。(3-1b-004)

◆211-212〈誌別〉

蓼莪愴絕不勝情，羌笛聲聲唱渭城。燕市秋高天慘淡，雞窗人去月淒清。泉分一勺

* 林玫儀，本所研究員。

枯魚活，雲繞千山旅雁征。遙指芙蓉好顏色，如今零落可憐生。(3-2a-005)
 曾向羊城賦壯遊，流光彈指去悠悠。蓬萊過眼真如夢，梧葉驚心又報秋。王粲登樓
 常作客，馮驩彈鋏不勝愁。感君惠我珍珠字，鄭重還同禰刺留。(3-2a-006)

◆213 〈曉行〉

客夢闌珊夜倍長，風搖鈴語響丁當。雞聲送客催殘月，馬足凌寒怯曉霜。一角白雲
 浮曙色，滿林紅葉占秋光。輪蹄此去何時已，搔首蒼茫望故鄉。(3-2a-007)

◆214 〈涿州口占〉

晴橋互長虹，雙塔忽飛出。遙山抱孤城，煙樹千重密。新雁帶雲來，奇字隨蘆筆。
 策馬去悠悠，鞭絲罨斜日。(3-2b-008)

◆215 〈移居澄江暨陽書院〉

浮雲積天末，蕩漾隨風舒。嗟我亦如雲，隨處便成居。客秋出京洛，局促同轅駒。
 敝廬苦湫隘，未足安琴書。一枝幸可借，買棹來江隅。青山笑相招，千疊青芙蕖。
 江流淨如練，新綠浮菰蒲。蕭齋傍宮牆書院在聖廟左側，聖域容我趨。長松作風雨，
 怪石蹲貔貅。錦綉迸新竹，翠蓋撐高梧。好鳥伴客吟，華月當窗虛。南軒寄嘯傲，
 昕夕留清娛。(3-2b-009)

◆216-219 〈吳潔甫州倅似漢自湖北回常，話舊感賦〉

三載長安別，今朝笑口開。一杯花下酌，雙擢賊中來。蜨蕪飛妖疹，滄桑話劫灰。
 長城誰可恃，須仗出群才。(3-3a-010)

張騫真博洽張司馬耀孫，常建亦風流常大令懿德。良友逢多難，湘江起暮愁。城孤浮劍
 氣，路險出矛頭。何日晨星聚，華燈共酒甌。(3-3a-011)

生計嗟寥落，全家倚宛鄰君寓外家宛鄰書屋。長途方跋涉，世事更艱辛。醉後原忘俗，
 愁中屢負春。祇留經笥在，塔影一編新君先人偉卿比部有《塔影樓詩鈔》。(3-3a-012)

我亦如窮鳥，啁啾返故林。皋魚揮急淚，斷雁寫哀音。荊璞千秋恨，吳鉤萬里心。
 君平今不見，何處問升沉。(3-3b-013)

◆220 〈春陰遣悶〉

一片油雲膩九皋，試燈孤負月輪高。打窗梅雪催詩興，拂面松風試酒豪。人倚曲闌天黯淡，寒生遠岫樹蕭騷。英雄髀肉嗟遲暮，中夜挑燈看寶刀。(3-3b-014)

◆221 〈哀武昌〉

壞雲接天黑，櫓檣互三湘。峩峩武昌城，一炬心孔傷。我朝二百載，恩德洽黎蒼。自平胡夏後康熙年胡耀乾、夏逢龍據武昌作亂，萬姓安且康。厄運值陽九，井蛙忽跳梁。養癰成巨疔，縱虎出高岡。岳陽既無備，門戶嗟已亡。漢皋本難守，兵潰賊逾狂。逞彼犬羊性，躡此傀儡場。四顧竟無人，都會居豺狼。徐公數城北，其貌竟不揚。常袞鮮奇策，臨事徒倉皇。一死等鴻毛，何能及童殤。餘子慨難數，守陴苦無方。但能捐頂踵，即可扶綱常。可憐武昌民，困苦逢黃楊。深林少靜柯，危巢有驚吭。簷端震礮火，夢裏飛刀光。白骨積皚皚，流血聲浪浪。赤眉與銅馬，不久膏斧斨。蒸黎愴何辜，小劫成紅羊。矧聞楚氛惡，江上飛鯨鯨。旌旗盼陸抗，撫馭勞張湯時陸立夫制軍與張小浦中丞在九江防堵。皖江山百重，白下樹千行。形勝扼上游，防範宜周詳。寄言司牧者，慎勿學武昌。(3-4a-015)

◆222 〈過王二庚大墓，詩以哀之〉

二十年前酒一卮，與君同醉社公祠。誰知河洛揚軫日，即是琅琊撤瑟時。宿草已迷荒塚路，垂楊仍發故鄉枝。蒼茫往事難回首，獨立斜陽愴鬢絲。(3-4b-016)

◆223 〈春感〉

潦倒情懷積悶思，空階獨步月迷離。十年枉獻長楊賦，一卷徒存短李詩。鳥入深林驚網密，蘭生寒谷怨春遲。世途反復真如奕，矧值烽煙滿目時。(3-5a-017)

◆224-225 〈燈詞〉

笙歌細細夜迢迢，行過長橋復短橋。燭影搖紅人影亂，衣香低逐晚風飄。(3-5a-018)

神祠到處盡光明，香火迷茫月二更。爆竹聲殘簫鼓靜，清笳一片起江城。(3-5a-019)

◆226 〈憶舊行寄懷常鏡峯懿慶、李紫蕃標兩大令〉

長安城頭一輪月，三人對影心相結。武昌城外千層山，兩人一別何時還。故交契闊隔江漢，蠢爾封狼忽生亂。愁心一夕度三湘，幾日東風吹不轉。常君握篆在漢皋常作漢陽令，徵兵練勇氣頗豪。事權掣肘竟無濟，孤城委棄乘輕舸。李君分符在安陸李作鍾祥令，蒿目瘡痍堪一哭。南鴻久已隔音書，天涯生死真難卜。宦海風波頃刻生，傳來消息倍心驚。臨危只恐成塗炭時聞賊兵已至鍾祥，失律尤難避典刑時常君奉旨嚴查。故人多難逢蛇蠍，我亦傷心怨啼鴉。宦味先嗟七不堪，世事真宜六太息。回憶都門共酒瓢，春光如海月如潮。六年舊事都成夢，百感蒼茫涕泗交。緘書欲致雙飛翼，復恐書成君不得。滿地烽煙鼓角哀，一片紅雲壓城黑。(3-5b-020)

桃源漁隱詩草卷四

北平袁績懋厚安

◆227 〈自北門夜赴龔邨舟中口占〉

菰蒲響蕭蕭，潮來岸空闊。天風掃雲氣，湧出一輪月。晴光罨村落，颿影入林樾。密草團流螢，危柯起驚鶻。嗟余際時艱，居處不遑息。北斗煥神芒，櫂槍自消滅。繁陰蔽天間，坐使金甌缺。哲人貴知幾，小隱暫藏拙。艤舟向桃源，清流卷飛雪。(4-1a-001)

◆228 〈移居有感〉

流離幸未走彭衙，青坂陳陶事可嗟。海上空求回紇馬，江干長豢永州蛇。潮來沙岸沉遺鏃，月落山城沸暮笳。百萬生靈悲失所，淒涼銚芑久無家。(4-1b-002)

◆229-232 〈江村遣興〉

黃鵠去萬里，飄忽無東西。寥寥碧天闊，浩浩孤雲飛。我豈慕高躅，天方降殺機。飢腹飽蛇羹，赤手捋虎髭。流毒卒然起，變故不可知。我有兩龍劍，無由獻丹墀。平子生四愁，梁鴻歌五噫。不如臥巖壑，藏器待清時。(4-1b-003)

林鳥得一枝，浮屠戀三宿。主人笑相迎，客子欣有託。房櫳勢軒敞¹，庭院氣肅

¹ 「敞」，原作「廠」。

穆。雲蒸到公石，煙鎖子猷竹。先業頗經營，後葉竟零落。大廈無人支，今古同一哭。開塵理書史，掃徑補花木。凡事有因緣，怡然在心曲。(4-1b-004)

少陵采黃獨，東坡煮泥芹。人生罹憂危，一飽已艱辛。空囊嗟已澀，硯田幸可耘。新秔炊玉粒，鮮膾斫銀鱗。時費杖頭錢，酌彼壺中春。忽念長安市，米價騰兼緡都門米價涌貴。漕遲真誤國，穀貴每傷民。幽憤入肝腎，日暮生微醺。(4-2a-005)

薄暮向東皋，微風卷禾黍。水車轉轆轤，疲犢倚筐簾。頗虞大田嘆，重益老農苦。殷殷起迅雷，習習沛甘雨。豐年定可致，強寇誰能禦。鋪張過熊羆，退避等鼯鼠。既逢民食足，毋使兵氣沮。何時去蝨賊，擊鼓迓田祖。(4-2a-006)

◆233 〈蟬〉

憐爾居高響，何人當作琴。斜陽催暮景，衰柳寄哀音。莫被蛛絲翳，深愁螿臂侵。秋風無限恨，有客欲沾襟。(4-2b-007)

◆234 〈觀釣〉

蘋溪新漲浮紅橋，桑榆交蔭垂楊飄。村童悄立綠陰裏，釣絲低趁微風搖。游魚咬水避人影，潛伏蒲藻方逍遙。嗚然中鉤出水面，玉尺枉向空中跳。筠籃紛攜瓦缶貯，失者怏怏²得者驕。我思得失真偶爾，不如淡泊任所遭。有時投餌出陽鱈，有時久坐無游鱮。桂綸翠餌永不折，滄溟終可連鯨鼈。買魚沽酒且一醉，俯仰天地皆浮泡。(4-2b-008)

◆235 〈浴罷口占和東坡次子由原韻〉

宿雨洗炎熱，園林淨如沐。人生小天地，吾亦喜新浴。年來入塵垢，僂骨苦難復。偶然得閒暇，隨意澣胸腹。巨鬻魚恐沸南中以鐵釜為浴器，余每浴，常恐加薪，斗水耐已足。銅臭毋櫻身，塵容休入目。汲此不貪泉，濯我無瑕玉。豈惟腰腳淨，兼使心肺沃。披衣步中庭，涼風振疏竹。蘭含秋氣清，茶煮春旗熟。比牖燈初明，東坡詩可讀。公方在儋州，謫處無人矚。我今依故鄉，新居幸可卜。盤銘日日新，一笑能糾督。(4-3a-009)

² 「怏怏」，原誤作「快快」。

◆236-239〈聞流賊竄入河北，而伯兄潮生方赴鄴郡，久無音信，感賦〉

羽林千騎趁歸鞭，賊黨如雲夜控弦。潁上河山餘夕照，洛中烽火接遙天。藩籬自棄株難守，萌蘖初生蔓已延。稍喜捷書傳陸贄，梁園風月尚依然陸稼堂中丞連獲勝仗，省垣未為賊兵攻破。(4-3b-010)

蒼莽平沙擁大河，投鞭直欲駕鼉鼉。神龍震怒沉舟楫，狡兔狂奔避網羅賊兵渡河，溺者甚眾。時河口無人守禦，賊遂徑至北岸。光弼旌旗空有色，平原涕淚恐無多。燕雲咫尺宜珍重，夙夜頻揮挽日戈。(4-4a-011)

屢為飢驅作遠遊，更逢兵燹阻征郵。寒鴞寂寞嗟雞肋，客路倉皇信馬頭。東去鶯鶯勞別夢，南飛烏鵲帶新愁。江湖滿地風波惡，且逐歸帆理釣鉤。(4-4a-012)

秋氣蕭條草木驚，江關豺虎尚縱橫。勢成犄角棋逾劫，病到瘡痍藥轉輕。金帶屢開丞相讎，石頭徒築護軍營。夜深龍劍凌風吼，似為英雄訴不平。(4-4a-013)

◆240-241〈急雨〉

北風卷雨送輕寒，簷溜琤琤瀉急湍。牆角潛龜游積潦，倚闌當作小池看。(4-4b-014)

大田辛苦出農蓑，日盼³甘霖養瑞禾。今日水車渾不用，笑聲應比雨聲多。(4-4b-015)

◆242〈七月八日舟中，夢與何廉昉吏部拭、龐寶生宮庶鐘璠、馬谷笙刺史振衢同遊西山。賦詩有「腳跟日月轉金輪，袖底星辰洒珠彈」，醒後書此足之，并寄三君子〉

詩魂如煙結天半，萬里長風吹不斷。白雲片片東南來，一角西山當几案。酒杯歷落挹天漿，椽筆縱橫蘸銀漢。腳跟日月轉金輪，袖底星辰洒珠彈。不知何時作邀約，竟爾清遊逞汗漫。昔我都門繫客舟，故人歡聚同魚貫。絲綸六載住西掖廉昉、谷笙皆辛丑中書同年，姓氏三人入東觀寶生係丁未第三人。坐花飲酒每傾盃，待月吟詩屢申旦。情親祇覺昆弟亞，興到或將爾汝喚。馬融符竹忽剖黔，袁粲焦桐竟入爨谷笙於庚戌冬得貴州刺史，余於辛亥秋奉諱還里。讒深薏苡出瀛州，飢食蕪菁走江岸。南飛鴻雁已告勞，東下豺狼更成亂。夜郎企望停雲深，京洛迢遙客星煥。士元名重擢冰銜寶生已得庶子，何遜才多掌花判廉昉時在選司。遠聞佳況輒歡忻，靜溯離悰益凄惋。誰知夢境入

³ 「盼」，原誤作「盼」。

迷離，竟與良朋共觚翰。得非山靈示狡獪，欲采新詩作珍玩。尻輪神馬定同遣，翠壁丹崖容飽看。且向天涯各問訊，可曾嚙語群推勘。人生夢合勝真離，長在睡鄉何足算。月落空江烏夜啼，一片潮聲春枕畔。(4-5a-016)

◆243 〈焦塾道中〉

雨洗秋山野雲淨，二水中分夾明鏡。輕帆一片過魚磯，白鷺決起空中飛。斜陽西沉月東上，菰蒲蕭瑟含風響。江上何時靖鼓鼙，獨倚疏篷指星象。(4-6a-017)

◆244 〈生雲垂露軒夜坐〉

空館久無人，蔓草條已長。窗暗聚蝸涎，塵昏冒蛛網。呼童急洒掃，入夜頗軒爽。池心塔影橫，松頂月輪上。高柳勒回風，新蒲散叢響。默坐觀古今，經師緬疇曩。前盧學沉酣抱經學士，後李才跌蕩申者庶常。當時德星聚，里社儒風決。賓主盡綢繆，英髦快宗仰。大雅嗟已淪，此事久輟講。寒鴛苦岑寂，官廨漸榛莽。古人重鄉學，多士宜培養。我欲企前徽，臨風作遐想。(4-6a-018)

◆245-246 〈晒舊簾書卷，檢得丙申河朔書院消夏聯句一紙。時馮芝馨編修琛方在院肄業，金大枚偶明府皋、屠可漁茂才有論同來下榻，酒酣耳熱，唱和甚豪。未滿廿年，三君子皆已化去，不勝今昔之感。因錄原詩，並倒用前韻和之〉

訪舊來河朔枚偶，堂開北海樽。文章推老輩可漁，氣誼合諸昆。正值炎歊節厚安，依然煙雨村。清淡蓮擁幕芝馨，列坐柳為藩。玉椀盛冰水枚，金波瀉月痕。風驅熱境轉漁，酒送冷香吞。花影添籬角厚，蟲聲出樹根。嫩涼醒薄醉芝，逸興靄高騫。入耳漁舟唱枚，驚心雷鼓喧。松棚高百尺漁，芸帙誦千番。夢悟遊仙枕厚，吟成避暑軒。簾紋垂畫檻芝，琴曲度雲門。綠篆蕉心字枚，青裁犢鼻褌。焚香金鴨暖漁，啜茗石泉溫。瓜戰分紅玉厚，榴飛護絳幡。燭光搖綺席芝，星采麗丹闈。欲步長堤去枚，遙看古剎存酒後同至古槐市。老僧迎客到漁，孤樹倚天尊。直立霜皮峭厚，全清霧眼昏。百圍生遠籟芝，一氣拱虛垣。山勢連王屋枚，河聲逼沁園。蒼茫尋舊躅漁，迤邐走平原。竹箭洪流疾厚，桃花濁浪渾。穆陵關外路芝。星海域西源。習習輕颺起枚，翩翩細葛翻。漏殘人已倦漁，歸晚鶴猶蹲。哲學逃禪靜厚，聊聽說鬼煩。遊思懷竹素芝，結契美蘭言。白髮爭駒隙枚，青燈蝕蠹魂。傳經幾家業漁，承露九霄恩。聚散渾無定厚，升沉且莫論。重教發醅飲芝，有榻下陳蕃枚。(4-6b-019)

舊雨傷零落，荒墳宿草蕃。星霜猶未久，詩酒與誰論。逝水嗟前夢，綈袍感故恩。重披蔡倫紙，欲訪屈原魂。父執欽耆碩，枝偶與先君子訂交三十年，朋儔訂晤言可漁、芝馨朝夕同處。劇談參雪亮，痛飲謝塵煩。老子猶龍踞，詞場共虎蹲。坐中年最少，筆下水能翻。攻玉資山石，推波助醴源。清思抽乙乙，豪氣動渾渾。邑乘方蒐討，儒林有本原。枝偶於丙申至脩武縣修志。一到之後，遂不可見矣。我初赴京洛，公已病文園。枝偶歿於丁酉冬。官蹇餘寒硯，家貧裹敗垣。靈旗飄白日，燭淚泣黃昏。先輩顏難駐，良朋道頗尊。芸編朱墨守，蘭譜姓名存。月旦逾千卷，雲程望九閭。支離驚鶴骨，漂泊怨花旛。賸有蓬山客，渾如寶玉溫。英姿文作陣，狂態屋為禪。桂馥魁鄉選，薇開步掖門。芝馨己亥科鄉舉第二，辛丑與余同得中書舍人。春明躋館閣，秋試盼軒軒。豈意人終古，真同夢幾番。淚隨歧路盡，聲罷酒爐喧。往事鴻泥換，遺章鳳紙騫。劫灰留斷燼，槁木寄靈根。運每分修短，丹空說吐吞。何能尋故侶，重與證題痕。自慨成雕朽，相逢屢觸藩。鳩鳴辭禁苑，蠖屈返江村。交誼懷車笠，詩情鍊鎬昆。模糊披篋笥，展誦倒清樽。(4-7b-020)

◆247 〈古意仿齊梁豔體〉

了鳥啟文窗，花枝照碧江。柔情春柳曼，清影秋芙蓉。鬢髮巫雲膩，低眉楚岫長。華鈿顫胡蝶，翠袖裁鴛鴦。斂羞霞暈采，作態月流光。條桑已盈陌，標梅未承筐。微波隔洛浦，覆水歸瞿塘。燕寂黃金屋，花飛白玉牀。靡蕪香滿徑，蒹葭天一方。願言采黃葛，使我心難降。(4-8b-021)

◆248-257 〈長晝無事分詠園中草木〉

長松挺千尺，欲向青雲撐。大木不成棟，怒濤時有聲。歲寒積霜雪，本性終難更。世俗尚柔脆，爾胡守其貞。松(4-9a-022)

隔院有深竹，根向空庭移。綠陰動蕭疏，我性頗相宜。直節豈諧俗，虛心方可師。安得約七友，脫帽來吟詩。竹(4-9a-023)

桐葉峙亭亭，空中碧雲瀉。聲價重龍門，名豈儕楸檟。日暮斤斧多，積薪委爨下。何必裁作琴，且依相山社。桐(4-9a-024)

幾日秋風來，花魂忽吹醒。小山可留人，吾道本無隱。馨香竟難闕，欣賞共遊騁。把酒不成歡，空齋月華冷。桂(4-9b-025)

一枝占高嶺，突兀凌百卉。盈虛見天心，培植得地氣。用汝調鼎鼐，太羹竟無味。

月夜影橫斜，春華何足貴。梅 (4-9b-026)

蠟丸綴千個，結根本同林。微風卷黃裳，自命有素心。豈知子如豆，餘毒結已深。
蠟梅子即巴豆。芳馨何酷烈，悵望寒雲沉。蠟梅 (4-9b-027)

阿堵何處來，春光竟可賣。終朝問子母，此樹真市儈。狂風掃園林，千萬倏空匱。
閉門謝和嶠，永守不貪戒。榆錢 (4-9b-028)

楊柳垂千條⁴，軟媚若無骨。一朝植靈和，恩波接太液。隨風寄柔絲，蘸水養濃
碧。顧此濯濯姿，何能歷霜雪。楊柳 (4-10a-029)

蒼生望衣被，高種陌上桑。如何承雨露，空建碧玉幢。春深綠葉肥，飢蠶已滿筐。
諸葛八百株，至今久淒涼。桑 (4-10a-030)

薜荔山鬼衣，黝黑鮮文采。厥性喜夤緣，得勢附魁癩。高下互盤結，芟夷終不悔。
滋蔓竟難圖，吾將擇爽塏。薜荔 (4-10a-031)

◆258〈夜起〉

碧紗鎖夢秋煙皺，月銜花影隨風透。闌干人靜疏鐘沉，碎露滴竹鳴清琴。桐影蕭蕭
柳陰密，雲繞長松壓門黑。一星螢火照池塘，老鶴無聲學人立。(4-10a-032)

◆259〈薄暮獨遊古寺〉

寺門冷落寒雲封，一絲日氣浮青松。塵昏敗壁鬼吹火，風入虛牖狐鳴鐘。古佛垂眉
伏龍像，深草沒膝遊蛇蜈。蟲聲催我速歸去，無使精魅來相從。(4-10b-033)

◆260-263〈芙江畫露根蘭一枝，活色生香，自饒丰韻。偶有所感，成小詩四絕， 即題紙尾〉

細垂密葉倒垂根，花氣迷茫月有痕。湘水無情風瑟瑟，不知何處是香魂。(4-10b-034)

曾向僊洲冠眾芳，一聲鶉鴉恨茫茫。江干寂寞無顏色，風雨空留九畹香。(4-11a-035)

空庭鶴弔月迷離，憔悴孤花賸一枝。我願馨香長作佩，循陔重補白華詩。(4-11a-036)

芳情脈脈骨珊珊，話到同心結古歡。付與春風勤護惜，年年秀色畫中看。(4-11a-037)

◆264〈閱孫芝房侍讀鼎臣奏牘有感〉

⁴ 「條」，原誤作「條」。

蒿日瘡痍氣未平，庸臣誤國竟偷生。朱雲徑欲誅張禹，秦穆猶思用孟明。紙上風霜原有色，空中雷電已無聲。徐公玉貌誇城北，豈料清名一旦傾。(4-11a-038)

◆265 〈積陰〉

北風起桑柘，吹得野陰來。木落蒼鷹健，天低客雁哀。癡雲堆作絮，積水暈生苔。秋士牢秋甚，無聊倒玉醅。(4-11b-039)

◆266 〈舟行夜雨〉

愁雲送征鴻，倦客掉歸艇。挂帆條卅里，暝色上零筭。水深搖斷夢，燭爇照孤影。離聲喧暮雨，蕭瑟洒蒲苐。瑤徽攬苦調，角枕抱虛警。風來無靜柯，秋至餘浮梗。耿耿不成眠，夜久衣裳冷。(4-11b-040)

◆267 〈村齋獨坐〉

秋氣響蕭騷，空齋夢亦勞。燈昏蛩語急，月黑雁行高。世路悲千折，華年感二毛。鷓枝棲乍穩，清夜試吟毫。(4-12a-041)

◆268-269 〈擬鮑照白紵歌〉

觥籌翻，燭奴爇。閨姝綽約雲鬟鞞。衣珠襦玉千金裹，年少科頭並肩坐。春情旖旎彈箜篌，晚風吹月搖簾鉤。酒潮花霧不知愁，年年此夕樂無休。(4-12a-042)

呼盧喝雉六博忙，清臚淺笑茱萸香。蒲桃暈臉紅霞光，菱花對影描新妝。主歡客醉樂無斁，齊謳未畢東方白。一朝金盡衣百結，門外逢君識不識。(4-12a-043)

◆270-271 〈江干晚眺〉

野外秋光早，孤村散寂寥。怪雲蒸海氣，落日蕩江潮。世亂民生蹙，兵疲賊胆驕。三農忻有望，甘雨秀良苗。(4-12b-044)

歲月竟如駛，梧桐已送秋。新巢移幕燕，浪跡伴溪鷗。星影嵌天動，江光接地浮。櫂檣起西北，更切杞人憂時有星變。(4-12b-045)

◆272-275 〈龔西園上舍棗和前詩原韻見贈再疊前韻答之〉

薊雲渺千里，詩社久寥寥余在都門，與諸同年向有詩會。今日逢耆宿，英詞挾怒潮。村幽

秋稼足，江近朔風驕。四海方多事，誰能格有苗。(4-12b-046)

靈光持大雅，筆底占高秋。鄰蔭分桑梓，詩盟結鷺鷗。清談書味足，聯韻墨香浮。
此地無矰弋，鷓棲且莫憂。(4-13a-047)

自笑詩成癖，孤吟振碧寥。遊蹤阮生屐，心事子胥潮。拙宦嗟樗散，勞生悟莠驕。
工文亦何益，焚硯學君苗。(4-13a-048)

世事同棋局，何人是奕秋。風高凌退鷁，江闊臥閒鷗。大地烽煙逼，孤城劍氣浮。
幾時洗兵甲，魯酒且忘憂。(4-13a-049)

◆276〈感事〉

於菟踞林陬，狐兔亦起起。山膏性善罵，蟾蜍出其口。蝥蛄與狼狽，獸二竟為友。
渾沌猶未鑿，黑白焉能剖。一笑姑置之，此類本非偶。(4-13b-050)

◆277-284〈汪夢梧學博^{彥樹}以近作見示，即和其秋懷八首〉

健筆如山峙霍宮，憂時真有浣花風。驚心烽火三吳接，蒿目瘡痍四海同。霜氣崢嶸
標勁草，秋懷寥落感飛蓬。希文兵甲羅胸久，都在長言詠歎中。(4-13b-051)

海波鼎沸擁天吳，百道空虛盡坦途。楊僕樓船潛鐵甕，陸機單袷委銅符。官民離散
爭青雀，城市荒涼竄赤狐。如此江山旬日棄，軍心惴怯古來無。(4-13b-052)

江北江南盡將臺，軍聲雄似海潮來。可能并力收遺孽，祇有連營障濁埃。豺虎已成
犄角勢，鷹鷂難覓出群才。東南半壁餘斜照，百萬飢鴻枉告哀。(4-14a-053)

八閩賊黨焰難收時上海亦未收復，誰向申江展壯猷⁵。群小效顰偏得志，諸君高壘已無
尤。長圍空領三千騎，酣戰惟餘百里侯謂丁蘭溪大令。寄語瀛洲真學士，漫教虺蜴起
邊愁。(4-14a-054)

縱橫窮寇逞餘威，劫掠脂膏橐盡肥。河洛方忻官埃冷，薊門又訝羽書飛賊已竄入直
隸。六軍擊尾空勞力，諸將同心定解圍。遙盼元戎操勝算謂勝克齋閣學，捷書早向柳
營揮。(4-14a-055)

兵革頻年轉餉難，天儲民力兩凋殘。搜羅杼軸追殷戶，鼓鑄錢刀出大官。聖主運籌
心已瘁，將軍坐食夢俱安。閭閻生計彌艱迫，從此馮驩缺屢彈。(4-14b-056)

豕突鯨奔不易防，浮生草草夢黃梁。避囂何處尋安土，解悶惟宜入醉鄉。蕢棊成蹊

⁵ 「猷」，原作「猶」。

難展步，萑蒲應募恐無良江西黃學川願募綠林破賊，恐亦非善策也。與君同覓桃源路，蟹舍魚磯尺五莊。(4-14b-057)

自憐血淚洒靈旗先慈於八月中棄養，株守江鄉雪滿籬。名不求知方是隱，貧原非病卻難醫。棲岩菌桂無顏色，入網冥鴻損羽儀。幸遇汪倫情最厚，流連詩酒屢神移。(4-14b-058)

◆285 〈夢梧集中有愁詩四章，作此奉慰兼以志慨〉

愁城千尋不可破，自古儒冠例窮餓。艱難矧值陽九時，愁心絡繹如縑絲。君愁我愁正同病，天生有才必無命。君居冷署歎卮漏，我坐寒氈慨瓶罄。霜天十月風怒號，烽煙滿地豺狼驕。居不得安枕，出不得揚鑣。官廚鮮宿春，良友無綈袍。老屋打頭草沒膝，寒燈夜坐蟲嚶嚶。知君與我兩愁絕，熱血憤涌流紅潮。我愁正難已，君愁尚可寬。澤宮幽且深，苜蓿香滿盤。萊衣奉高堂，色笑常承歡。趨庭蘭玉挺奇采，更勝珍珠十斛金琅玕。君才明敏復殊俗，不日飛鳴出幽谷。泰山雲起作霖雨，何必循牆計鱸粥。惟我局促同轅駒，樂羊謗滿中山書。玉皇笑我少仙骨，罡風吹落青雲衢。椿蔭復交謝，血淚凝模糊。米鹽苦瑣屑，兒女紛相呼。蒜髮本無情，星星上頭顱。前望茫茫盡荊棘，後顧落落皆榛蕪。不知蒼天生我作何事，四十華年等閒棄。筆耕墨耨是生涯，仰人眉睫終非計。我今酌酒呼愁魔，送爾遠去南山阿。妖星落地九州靖，敝廬安堵春風多。開窗臨密竹，澹水披新荷。落花滿琴牀，好鳥同吟哦。待過三萬六千日，爾再與我來婆娑。愁魔搖首不肯去，助我囊中好詩句。朝愁暮愁愁不休，落葉無言下庭樹。(4-15a-059)

◆286-287 〈暨陽小住，書寄芙江〉

三載流光一霎過芙江歸余已三年，情懷與我共煎磨。雲中無處尋瑤島，江上頻年枕鐵戈。淚洒莠蒿哀痛迸，詩成楊柳別離多。滿腔熱血誰堪訴，獨向西風喚奈何。(4-16a-060)

霜天風緊硯池寒，世態淒涼白眼看。銅臭驕人常赫奕，冰銜失路總辛酸。嘗來雞肋無餘味，累到豬肝有大難。一穗疏燈愁不寐，蕭蕭修竹響空闌。(4-16a-061)

◆288 〈題翟讓溪明府鑠觀詩卷〉

蕭齋落葉鳴空墀，疏檠如豆搖風絲。忽然案上發光氣，雲霞絢爛雷霆馳。淒霜下被

出鷗鷺，碧澗倒立騰虬螭。群玉山頭古珍聚，眾香國裏清芬披。然疑愕立不可狀，誰識詩卷開神奇。我初謁公在京洛，宣南高會傾玻璃。軟紅十丈盡塵俗，未及握手談新詩。邇來江上拭寒硯，官閣復得親光儀。兩間厄運值陽九，巖城突兀飛旌旗。撫綏黎庶各安堵，整飭士卒同登陴。龍韜豹略蘊韓范，政績卓著誰能追。得聞示我詩五卷，驚躍欲倒心神怡。古來不過數枝筆，漢魏唐宋常分支。公以一手扼其要，清奇濃淡咸相宜。長安花月夜，貴陽風雨時。舟車五千里，濁酒三百卮。或夢翕園吐肝臆，或念魏闕撚吟髭。友朋酬唱樂無斁，山水刻畫情先移。興來隨意偶揮寫，吁吁芴芴抽清思。靈光不受點塵俗，是有神助非人為。嗟我年少喜塗抹，手持一卷常嘔吟。萍蹤浪跡半天下，公所歷處皆親之。揚舲湘水弔屈子，躡屐粵嶺尋安期。南經章貢洗塵眼，北泝河洛開詩脾。明湖一曲快遊覽，薊門十載常棲遲。江山盡雄闊，煙樹何迷離。外孫齷白竟難得，吟囊龔澀真可嗤。今朝浣讀紀遊作，如以鹽媮逢夷施。其餘陶情寫性各篇什，更若蓬萊方丈難攀躋。手胼心醉口流沫，惟有頰首呼為師。願公即日付梨棗，嘉惠後進宜群迷。江南不久靖蛇蠍，休沐更可添新詞。會昌一品再成集，主持風雅歌雍熙。(4-16b-062)

◆289 〈聞雁〉

稻梁無處覓，憐爾獨衝寒。斯世多烽火，何人惜羽翰。天高霜氣肅，木落陣雲酸。底事哀鳴急，因知失路難。(4-17b-063)

◆290 〈歸舟將發，翟讓溪明府蝶觀留飲〉

歸心挂江樹，駕我沙棠舟。白雲含雨來，颯颯生離愁。翟公雅好客，觴詠重句留。鮭菜清且腴，三雅傾深甌。談心出肺腑，如以磁芥投。俗吏事催科，詩酒皆成仇。寒酸溷乃公，呵叱圓雙眸。殷勤愛士風，當世真難求。如君誠絕俗，開閣延枚鄒。壺飧不足重，古誼逾琳球。密雨勢頗濃，簷溜飛急流。感恩原惜別，飢驅不自由。晚鐘帶煙溼，送客城西陬。(4-18a-064)

◆291 〈到家〉

年來息轍返江城，定有慈親喚小名。今日總帷長寂寞，空教血淚洒縱橫。麻衣六載天何酷，鐵騎千重世未平。悵望揚州騎鶴去，誰憐遊子問征程。(4-18b-065)

◆292-295〈江城雜詠〉

干戈林立繞龍城，牛斗方誇劍氣橫。豈有汪錡能衛國，空聞趙括善談兵。山中醜類招狐兔，海上妖氛走鱷鯨。莫信口禪皆妙諦，由來忠義是虛名。(4-18b-066)

傀儡登場妙計儲，滿城士卒建華旗。安排刀劍供兒戲，搜索倉箱到女閭。百雉崇墉誇粉繪，雙雞公館飽權輿。祇愁賊騎倉皇候，未必甘心守敝廬。(4-18b-067)

孫陽相馬出驪黃，一遇喬松舌有銚。赤手居然擒虎豹，綠林從此出豺狼。汗駒未試馳驅用，突騎先求狝狝裝。萬廩空空真似磬，不知何處問芻糧。(4-19a-068)

幻術無憑棘刺猴，諸君啜汁已忘憂。知幾且作移巢燕，失路終成破卵鳩。半壁江山凝暮氣，滿城風雨嘯清秋。狂吟不減窮途哭，搔首蒼茫獨倚樓。(4-19a-069)

◆296〈將赴揚州留別揚廷二弟〉

豈說鳶鷂肉，鵝雛屢告饑。天涯重作客，予季漫牽衣。世亂多烽火，山空賸蕨薇。稻粱如可足，息轍臥柴扉。(4-19b-070)

◆297〈由諫壁渡江，風浪大作，遂泊爛泥套〉

白雲一片秋潮生，送我雙槳東南行。圖山突兀跨江面，一塔招手如相迎。忽然荻葦響蕭瑟，石尤縱恣偏無情。水欲下注風欲上，浪花十丈空中撐。老魚吹沫作飛雨，遊豨鼓鬣形彭亨。輕舟搖簸片帆側，俯仰身世如浮萍。且尋曲港繫征棹，幾縷日腳銜山明。巡兵老弱聚三五時有官兵在彼防堵，鐵礮鑪⁶澀江邊橫江口砲位均已倒塌。側身西望長太息，腥涎毒霧藏蛟鯨。潤州形勢本天險，北固屏障尤崢嶸。高牙大纛盡群豎，坐使賊騎凌江城。東風連日助聲勢，赤壁正可燒曹兵。六軍不動互推諉，戈鋌滿地終無成。我欲橫江跨樓艦，掃蕩沴氣歸清平。煙霾陰翳日輪暗，腰劍空作神龍鳴。天涯落拓苦奔走，蹤跡竟與群鷗盟。故園咫尺不可見，愁如江水常盈盈。一尊濁酒洗離恨，狂風入戶搖疏檠。扁舟明日宿何處，臥聽濁浪鳴瓊瑤。(4-19b-071)

◆298〈仙女廟夜泊〉

村市半蕭條，頽垣賊火燒。戈矛明兩岸，刁斗肅中宵。風急星芒動，潮生月影搖。

⁶ 「鑪」，原誤作「鑪」。

客懷愁不寐，魯酒解無聊。(4-20b-072)

◆299-302〈灣頭雜詠〉

通侯家世珥蟬貂，上將登壇意氣驕。露布屢馳燕市月，柳營空沸廣陵潮。棄瑕共識君恩重，養寇真令士氣消。試問平章典何事，兩行水調擁輕橈。(4-20b-073)

文人慧業本天成，年少還吹子晉笙。翰墨久推詞苑秀，旌旗未卜丈人貞。南喬北梓餘秋色，去燕來鴻盡楚聲。何必綠章裁鶴俸，軍儲坐食已千簋。(4-20b-074)

誰遣靈查海上來，瑯嬛福地獨徘徊。春雷擊鼓空含怒，陳粟登倉已化灰。談笑欲儲軍國計，瘡痍遑恤士民哀。杜陵慷慨吟諸將，涕泗縱橫在草萊。(4-21a-075)

植黨營私眼界新，芙蓉幕下少完人。冰山有路堪容足，石火無常願保身。桃李已虛三徑約，蒹葭合泛五湖濱。此行騎得揚州鶴，飛去飛來樂最真。(4-21a-076)

◆303-304〈泊高郵有懷魏默深刺史源〉

著盡奇書博一官，置郵何事被蕉彈君以驛務遲誤免官。聰明未必收庸福，千古才人一例看。(4-21a-077)

雙塔灣頭水獨清，了翁當日播循聲。孤舟獨宿三更雨，誰向離亭唱渭城。(4-21b-078)

◆305〈舟次袁浦志感〉

聞道萑蒲惡，行人正戒途。飢寒驅醜類，患難見真儒。道遠輪蹄瘁，秋高劍氣孤。但前何所畏，莫效聽冰狐。(4-21b-079)

◆306〈河堤野望〉

河斷清流續，沙高野岸低。稽堆環碧柳，葦壁襯黃泥。馬向門前飲，雞從樹上棲。衝寒行未已，遙指夕陽西。(4-21b-080)

◆307〈曉發桃源寒甚〉

自笑忙何事，雞鳴已整鞭。溪鐘催月落，堤樹抱天圓。霜重沙俱滑，風酸馬不前。羨他高隱者，日上擁衾眠。(4-22a-081)

◆308 〈與季少尉_圭話別〉

相逢一帆風，相別兩輪雪。東勞西燕各分飛，酒畔紅燈黯無色。與君同是向天涯，客中送客彌咨嗟。疏林一幅馬蹄疾，但見烏帽隨風斜。(4-22a-082)

◆309 〈雪後望芒碭山〉

青山拱彭城，猛勢向空闊。千盤壓河源，一髮繫天末。形隨獅象蹲，氣接龍蛇活。征途正鬱紆，清景極寥豁。天高雪初晴，林疏葉全脫。青煙作團飛，白霧擎架闕。崢嶸鹿角張，錯雜獸齒齧。此地多英雄，出世善宰割。長吟大風歌，四海待匡撥。(4-22a-083)

◆310-311 〈聞桐城失守弔呂鶴田侍郎_{賢基}、朱臥雲比部_{麟祺}〉

請纓慷慨出卿曹，耿耿丹心貫孟勞。江上孤城危似卵，淮南群寇亂如毛。呂端力盡無長策，光弼兵殘有短刀。回首烏山空太息，將星黯淡陣雲高侍郎籍隸旌德。(4-22b-084)

朱雲豪氣賦從軍，幕府風流迥出群。隻手豈能當大敵，寸心猶欲靖妖氛。魂歸瓜步迷衰草，血染桐陽泣暮雲臥雲家在揚州。戰馬負屍行十里，傷心惡耗不堪聞。(4-22b-085)

◆312 〈周文忠尚書輓詞〉

擒盜如擒鼠，聲威穎上聞。傳應登酷吏，名已署將軍。撫劍渾忘老，連營屢策勳。定知成厲鬼，殺賊報吾君。(4-23a-086)

◆313 〈永城道中〉

殘雪含枯葉，微風卷麥苗。佩刀民勇悍，近水地肥饒。市小知魚賤，沙平讓馬驕。鳴琴人已去謂呂大令贊陽，客子倍無繆。(4-23a-087)

◆314 〈過甯陵〉

賊過人煙少，田荒野草多。頽垣餘瓦礫，小市滿干戈。日落鴉爭樹，風高雁渡河。蓬蒿荒蔣徑謂蔣大令桂森，消息近如何。(4-23b-088)

◆315 〈睢州湯文正祠〉

姓名登兩廡，功烈被三吳。今我葵邱過，臨風感歎俱。文章原末節，理學是真儒。寂寞祠堂在，空庭長綠蕪。(4-23b-089)

◆316 〈杞縣道中微雨〉

千絲雨腳散平沙，十里垂楊夾道遮。天氣成陰雲作陣，土膏含潤麥生芽。驛亭馬去馳兵檄，荒市雞鳴少酒家。差喜平安無寇警，午風緩緩送征車。(4-23b-090)

◆317 〈聞陸稼堂中丞罷職入都感賦〉

浮雲變幻竟難知，燕去鴻來已後時。陸抗旌旗空想象，袁絲琴劍倍淒其。馬因失路嘶風急，鶴為凌寒舞月遲。回首薊門長太息，欲將黃葛寄相思。(4-24a-091)

◆318-319 〈與周春門觀察殿微夜話時事〉

二百年來頌止戈，沙場鋒鏑盡銷磨。文人競習清平調，壯士難求曳落河。帷幄從容飛將少，芻糧竭蹶潰兵多。狂瀾誰作中流柱，蒿目瘡痍可奈何。(4-24a-092)

昔年西粵賦從戎，今日梁園奏武功。汴城守禦，以君為最。將不同心難戰守，士能效死即英雄。妖星犯斗愁雲白，殺氣連天戰血紅。君是孝侯我袁粲，一尊相約勵孤忠。(4-24b-093)

◆320-321 〈訪了空上人不遇〉

昔日聯裙屐，秋風上吹臺。客隨黃葉去，僧踏白雲來。前年九日，與士人同遊吹臺。今我尋蕭寺，空齋長暗苔。徘徊經舊地，猿鶴漫相猜。(4-24b-094)

早識儒冠誤，緇衣證上乘。世間俱是幻，我亦願為僧。畫本思吳絹，詩篇問剡藤。參寥在何處，惆悵失吟朋。(4-24b-095)

◆322 〈石燕道中〉

燕子何時來，落地倏成石。春風開畫簾，翼重飛不得。山花絢爛開滿林，彷彿疑是雙紅襟。烏衣門巷在何處，一片人家罨雲樹。夕照迷茫畫角鳴，隨著春潮自來去。(4-25a-096)

◆323 〈讀庾蘭成集〉

哀絃起清夜，蕭颯風雨聲。孤懷繫君國，幽怨終難平。淵源本小雅，憂念發性情。
宮體苦側豔，柔曼意所輕。春易桃李姿，歲寒松柏貞。(4-25a-097)

◆324-325 〈芙蓉寄詩二章，作此奉答即步原韻〉

良夜寂無人，松頂月華照。歸心向南飛，隨風入林杪。所思不可見，仰首星辰皎。
勞薪何日已，獨坐百憂悄。(4-25b-098)

家貧苦離別，世亂事復違。中夜撫哀絃，借問知者誰。捧雪拭寒硯，梅花香滿池。
雪乾池易涸，時雨待春時。(4-25b-099)

◆326 〈連日陰晦，漉酒獨酌，擬淵明飲酒詩撥悶〉

百年一旦暮，世事如浮雲。冥心無所思，以酒存吾真。昨夜微雨過，園林無纖塵。
一杯甫在手，熙然坐陽春。隨意一卷書，古人紛來親。我語人不知，我歌人不聞。
筌蹄已互忘，默與元化鄰。一身且馮虛，何論富與貧。我心何所師，公榮與伯倫。
(4-25b-100)

◆327 〈蕭齋〉

蕭齋長養靜，春徑方誅茅。座無俗客至，門有清風敲。宵燈理詩帙，晨香觀羲爻。
緣草蠹爭垤，銜花燕營巢。槐空腹生火，松禿節凝膠。階筍香佐飯，池魚鮮充庖。
酒招狂阮飲，書解吃揚嘲。醢雞欣發幪，尻馬且鳴鞘。當世正多事，此方洵樂郊。
煙霞成痼疾，泉石訂深交。毋⁷使北隴笑，願借南華鈔。(4-26a-101)

◆328 〈曉起池上閒步〉

睡倦眼如醉，不知曉日生。偶然拂羅幌，曙色浮簾旌。攬衣步庭除，細草何菁菁。
鹿蔥發紅蕤，木筆浮紫瑛。籀龍起春雷，隨處森錦綉。微風洒然至，池水搖空明。
綠楊夾左右，塔影中間橫。游儵一二寸，流鶯三兩聲。達人本無機，魚鳥皆忘情。
及時得休暇，終日蔽柴荆。(4-26b-102)

⁷ 「毋」，原誤作「母」。

◆329 〈下山至梅花書院小坐〉

斜陽捲春潮，催我覓歸徑。山寺幽且深，叩門鶴先應。林木散古香，風泉聳虛聽。樓臺妥位置，花鳥助歌詠。詩情與畫意，石壁雲霞迸壁上皆石刻詩畫。回首碧煙高，蒼然一聲磬。(4-26b-103)

◆330 〈與史二致謨夜話有感〉

大行非高海非險，世路崢嶸更難踐。吳紗非薄冰非寒，人情淡漠尤辛酸。胡為天上雲，暮下井中石。南陽久無劉孝標，東海誰是孫賓碩。勸君且讀書，日與古人居。否則隱山林，花鳥⁸結同心。世間萬事無一可，欲恃聰明計已左。君不見，鳳守籬，麟轉磨。神龍失水螻蟻爭，仙桂成薪斧斤剝。冰山高高不可攀，銅山遺臭千百年。兩山突兀對相峙，坐令我輩無歡顏。朱門飽樽俎，豈識飢者苦。富兒擁狐裘，誰知寒者愁。青天無雲高不語，書難成炊字難煮。春申墓上白草生，江風吹起哀鴻聲。憐君與我有同病，白柄長鑱托為命。我身已類填海禽，君況還成屈刀鏡。杜陵廣廈白傅裘，生平志願偏難酬。才士當前不使遇，此事終令吾曹羞。與君痛飲酒無數，燈光微紅月流素。酒酣人醉起長吁，驚起棲鳥繞庭樹。(4-27a-104)

◆331-338 〈閒居雜詠並序〉

紅塵滾滾，何地能閒。白日堂堂，過時云邁。矧乃妖星未落，大江正寒。買山鮮十笏之資，入門有百鈞之累。明鏡蒸食，誰鑒古懷。焦桐作薪，時蓄苦調。花還濺淚，雪漸盈頭。王粲之客荊州，原非得計；袁安之念王室，無可解憂。摘彼微詞，摠茲幽憤。澧蘭沅芷，靈均寫其鬱紆；病橘枯樓，杜陵託諸諷諭。小園有賦，陋室可銘。敢誇觴詠風流，且令卮言日出。

〈刈草〉

中庭頗空闊，創始費經營。主人勤洒掃，爽氣滿軒楹。薙氏一失職，百草漸勾萌。荊杞既當道，蛇蠍遂縱橫。我欲靖群毒，宿莽先澄清。(4-28a-105)

⁸ 「鳥」，原誤作「烏」。

〈灌花〉

無花空咨嗟，有花共忻賞。才質非不多，所恃在培養。挈瓶智漫矜，抱甕愚可想。平時勤拂拭，百彙盡高朗。莫使錦繡姿，枯槁在榛莽。(4-28b-106)

〈斲筍〉

渭川饑太守，調鼎苦無羹。春雷鳴格格，龍角猶未萌。藏珍不肯獻，慳吝性所成。腴削到重泉，新籜始崢嶸。祇恐地氣傷，無以息群生。(4-28b-107)

〈移石〉

爾心何混沌，爾形何冥頑。問石石不言，硜然成老慳。嗟爾一卷微，豈能視為山。有髓不可吸，王烈空往還。移之置荒壤，使我開心顏。(4-29a-108)

〈觀蟻〉

晨起兒童呼，踊躍觀陣勢。隊伍何堂皇，群蟻蠢然至。飛蠹領前驅，元蚋統後騎。縱橫有戰才，保衛無遺地。一旦竹雞鳴，水化空含淚。(4-29a-109)

〈驅蜂〉

春光三月暮，花事漸闌珊。金翼倏飛來，自詡真蜜官。芳菲竟無厭，捷足爭先攢。官衙醞釀成，百卉嗟已殘。此輩日流毒，香國何能安。(4-29b-110)

〈養魚〉

清池接泮水，芹藻披春風。育育浮千頭，游泳樂無窮。自古蛟龍才，安知非此中。雷雨苟有時，鱗甲騰太空。祇愁涓滴微，一勺魚難容。(4-29b-111)

〈放鶴〉

仙駕落雲中，無端遇鷓⁹鳩。秋風毛羽寒，忻厭聽俗客。飲啄不自由，一粟亦難獲。思尋元圃夢，重展凌霄翮。烽火滿關山，何處容棲息。(4-29b-112)

⁹ 「鷓」，原作「題」。

◆339 〈花下獨醉後放歌〉

青天如磨停雲飛，大江東去日西馳。一年好春能幾日，一日好花能幾枝。有花不解飲，花亦無嬌姿。有酒不知醉，酒亦無歡卮。東風昨夜起林薄，花神綽約來空谷。紅霏赤城霞，白染藍田玉。紫雲黃雪紛千簇。滿庭花氣濃於煙，酒星錯落懸尊前。元丹邱，李青蓮。岑參挹我袖，伯倫拍我肩。約我醴泉住，招我糟邱眠。天漿萬斛向空潑，陶然長醉三千年。鸞鳩在霄鶴在野，醒亦非真醉非假。人生得失如浮雲，問君不飲胡為者。君不見，淮水南，桑乾北，干戈滿地無消息。朝旌旄，暮縲綬，冠蓋蒼茫紛似織。一枝已可安，一粟亦可飽。硯匣不離身，琴徽長在抱。夕陽欲下蒼煙鋪，數聲好鳥催提壺。春衣盡付酒家典，縱橫三雅傾醍醐。花為主人我為客，不知何者為今吾。玉山倒臥枕苔蘚，花亦有情來作伴。好春一去花辭枝，莫使金尊有空時。(4-30a-113)

◆340 〈雨中獨坐〉

一塔出煙中，倒影碧池臥。雲密天漸低，風急雨更大。青萍鋪綠錦，白點忽打破。菰蒲翻颯颯，新竹搖個個。鶉鷓悄無聲，暗伺游魚過。愁多句易覓，酒薄興先惰。獨倚碧窗紗，暝色入吟座。(4-31a-114)

◆341 〈晚霽口占〉

雷聲帶雨歸，風勢逐雲去。天光半明晦，一紙斜陽露。蜉蝣緣溼草，烏鵲爭乾樹。暮色蒼然來，樓臺入煙霧。疑展雲林畫，偶誦劍南句。石畔采孤花，池邊招宿鷺。淡月照微黃，梧桐最高處。(4-31a-115)

◆342 〈夜夢亡婦感賦〉

別君已四秋，晤君纔一刻。君從何處來，駕彼凌風翼。相逢各握手，密緒吐肝臆。淚眼照菱花，依然舊顏色。人生本如夢，夢去空霑臆。月黑紙窗寒，猶疑魂在側。(4-31b-116)

◆343 〈薛絮方茂才招遊君山，觀武童馬射，遂至圓覺齋小酌。同行者為史雨香烟丈、薛生若照、承生彪雲〉

江城雨過白沙軟，射圃宏開碧草短。少年結隊白馬嘶，齊向山前調羽箛。兩行笳鼓春雷喧，一片旌旗北風捲。鏜然作勢金聲喧¹⁰，舂爾分行馬蹄展。五花噴沫鷗韉飛，三箭連珠寶弓滿。人影捷於驚鳥過，鞭絲低向輕塵轉。我朝弧矢利天下，大比三年有令典。即令江上多烽煙，多士真宜武功顯。所嗟吳兒夙柔脆，膂力未剛技能淺。沙場邇來尚火器，紅衣九節應先演。賊營倘用阿奴策，基昌善射殊難免。壯夫念國空憂煎，龍劍無光起苔蘚。幻夢猶思紫光畫，清班難與華林宴。飄零書劍滯江瀨，祇合山僧作枯伴。蔬茗紛陳出香積，肉食何須割鮮鱠。吟朋難得盡知心，童冠偕行共消遣。安得猛士聽指揮，箭上同將賊血澆。(4-31b-117)

◆344〈長夏口占〉

長晝無一事，坐臥惟攤書。枕上偶釋卷，不覺入華胥。覺來飲苦茗，夕照浮庭除。溪柳密於幄，俯見千頭魚。隨意一垂釣，得失任所如。自得靜者樂，藉以養清虛。(4-32b-118)

◆345-348〈丙辰四月復有中州之行，舟次丹陽大雨口占〉

兩行楊柳綠，送我上征船。帆影迷寒雨，人聲出暮煙。身閒心轉定，賊近胆常懸。鼓角喧城上，中宵攪客眠。(4-32b-119)

纔拂東華雪，重移北固舟。勞勞亭畔草，泛泛水中鷗。燈火欺孤夢，江山助壯遊。精金宜百鍊，豈屑稻粱謀。(4-33a-120)

滿地干戈惡，驕兵意氣驪。爭舟顛逐雀，抽稅懶窺魚。終歲籌經費，何時奏捷書。東南望休息，無處覓夷吾。(4-33a-121)

世亂資經濟，何須翰墨緣。漫誇揚子字，且著祖生鞭。萬馬晨揮檄，雙鷗夜控弦。頭顱猶未老，腰下拭龍泉。(4-33a-122)

◆349〈眇驪行〉

秃尾蕭蕭一目¹¹眇，四蹄輕利捷於鳥。日行百里心不足，昂首長鳴思遠道。前生想是秦符生，刺血豪氣猶縱橫。否則沙陀李亞子，統領鴉兒能效死。爾形雖敝神則

¹⁰ 「喧」，原作「宣」。

¹¹ 「目」，原誤作「日」。

全，衝泥入淖勇無前。倘隨壯士去殺賊，定與騏驎爭摩肩。可憐淪落困人手，芻秣區區事奔走。隻眼應知世路難，何時能釋仔肩負。吁嗟乎！古來皮相無英雄，物色豈在驪黃中。如汝人才作令僕，應勝當年盲老公。(4-33a-123)

◆350〈晚宿蘭陽〉

落日明荒堡，迢迢路百盤。提高河作帶，屋密樹成團。野渡牙檣少，孤營鐵甲寒河口有兵勇防堵。妖氣何日靖，直北望長安。(4-33b-124)

◆351-352〈到大梁口占〉

八年六度賦遊梁自戊申至乙卯，已六次矣，鞍馬蕭條向夕陽。自笑此身同社燕，春來秋去為誰忙。(4-34a-125)

羊頭羊胃滿紅塵，漸覺風流少故人。惟有兩行堤畔柳，多情依舊繞征輪。(4-34a-126)

◆353-354〈同安差次，口占二律書寄芙江〉

獨坐閒無事，明窗卷碧紗。偶將書作仇，忽有夢還家。樹綠疑浮黛，蕉紅正著花。晚風低颺處，一縷篆煙斜。(4-34a-127)

蕭蕭終夜雨，陡覺薄寒侵。風壓雲根重，天連海氣陰。治瘍嚴酒戒，監水悟民心。好作良司牧，蒼生屬望深。(4-34a-128)

◆355-358〈差次同安，偶成四章，寄懷汪夢梧學博並同學諸君子〉

北風吹南雲，飛落吳江口。江水抱孤城，中有同心友。佛桑戀三宿，矧我七年久。往來君子堂，瀟灑絕塵垢。窗外鳥催詩，階前筍佐酒。良緣訂翰墨，奇句滿牆牖。自慚俗未除，彈冠覓升斗。塔影亦留人，凌空欲招手。(4-34b-129)

澄江誰最憶，我憶垂露軒。曲池寬一畝，明鏡空無痕。綠陰繞四面，彷彿春雲屯。偶然翠鳥來，悄立新葦根。游儻倏驚避，潑刺浮萍翻。領略靜中趣，默坐頻忘言。花木更繁衍，四時香滿園。此樂幾時再，回首增憂煩。(4-34b-130)

君山跨江來，靈秀快鍾毓。主講皆經師，多士共陶淑。所嗟俗未淳，勦襲與輕薄。我欲革其習，六載勤磨琢。非誇一日長，將樹十年木。文學誰最優，周慰曾陳熙治薛寶渠趙銓祝善貽。讀書非為名，明理即已足。努力崇前修，遠人方拭目。(4-35a-131)
昔我夢乘槎，隨風入南海。今我來閩中，夢境宛然在。此邦被兵燹，蒿目皆瘡痍。

民情習為盜，誅夷終不悔。司牧盡雜流，朝更夕又改。恩威互相濟，首在求賢宰。空糜太倉粟，搔首每生慨。所望良朋書，惠我作模楷。明月忽飛來，屋梁作光采。(4-35a-132)

◆359-360〈自歷戎行，倏已四月。七夕已屆，人各一方。細雨孤燈，愴然憶別。口占二絕，以寄芙江〉

連歲浮蹤作遠行，今年按劍賦長征。燈前一夜蕭蕭雨，似向天河洗甲兵。(4-35b-133)
曾從七夕訂歸期，話到中秋已恨遲。滿地烽煙何日掃，空勞雲錦說相思。(4-35b-134)

三山吳玉田鐫字

◆361¹²〈雨窗漫興〉

雲氣迷蒙黯碧霄，蕭蕭密雨洒芭蕉。香殘寶鼎煙猶捲，風逼疏簾暑乍消。積水侵階微作浪，溼苔緣壁暗生潮。隔鄰弦管喧闐甚，一片歌聲送早朝。

◆362〈和芙江江行口占和作原韻〉¹³

幾日西風起，疏篷破浪來。樹濃山似黛，碓近水成雷。薄醉羈愁重，寒燈客夢回。何時賦歸去，三徑埽莓苔。

◆363-365〈再疊前韻畚小雲妹〉

知君詩興入雲霄娟，寫罷芸箋更寫蕉。瓜試寒冰香倍冷厚，茶烹新水渴能消。喚晴鳩語初依樹娟，卓午雞聲欲伺潮。深苦炎蒸揮汗雨厚，不如靄霖徧崇朝娟。

玉笙幾度試叢霄厚，午倦無聊欲夢蕉。好句每從閒處得娟，流光都向靜中消。新醅染螳招徐邈厚，小篆盤蝸學李潮。祇有心愁揮不去娟，空教離恨鎖朝朝厚。

何時霽色靄晴霄娟，窗外添栽鳳尾蕉。竹引微風新綠捲厚，花因久雨亂紅消。涼生

¹² 以下為散見錫璇詩集中之袁續懋詩作。(361)-(362)為唱和之作，(363)-(370)為聯句之作，(371)-(372)為二人合撰者，諸詩已收入〈左錫璇詩詞集輯校(二)〉，茲附列於此。其中(361)、(362)二首之詩題為筆者所代擬。按：(361)一首原附於錫璇〈步厚安雨窗漫興原韻〉(密雨廉纖散九霄)之後，故定詩題為〈雨窗漫興〉。

¹³ 此首原附於錫璇〈江行口占〉(山似雲中出)一詩之後，茲依袁氏和作之習見寫法，為擬題〈和芙江江行口占原韻〉。

竹屋開詩社娟，香泛荷筩暈酒潮。知否百年如過客厚，願吟三萬六千朝娟。

◆366〈聞廣西賊氛未平，與厚安聯句，復用前韻〉

西粵烽煙接九霄娟，荔宮何日值甘蕉。軍威已似雲龍盛厚，敵勢難同水蛭消。瀘水空揮諸葛扇娟，蠻溪時漲尹公潮。從戎我欲彈長鈇厚，剪滅鯨鯢在此朝娟。

◆367〈聞賊兵圍武昌城感賦，與厚菴聯句〉

匝地烽煙接漢皋厚，楚山湘水陣雲高。燈前看劍心猶壯娟，夜半聞雞氣倍豪。回首空城悲玉石厚，驚心樓櫓趁風濤。洗兵何日逢時雨娟，我欲從戎試戰袍厚。

◆368-369〈春陰遣懷聯句〉

連日陰雲低九皋娟，試燈辜負月輪高。輕寒料峭遲花信厚，春意闌珊讓酒豪。雨洗苔痕凝古黛娟，風搖松影吼驚濤。攜筇野眺晴無限厚，草色青青已似袍娟。
輕煙漠漠覆蘭皋娟，風急長天雁陣高。細雨溼花微有跡厚，薄寒中酒漫稱豪。燈搖古壁催歸夢娟，春入空江長暮濤。此日鹿門聊共隱厚，琵琶莫鼓鬱輪袍娟。

◆370〈送浣香姊營葬後回舟，與厚安聯句〉

瀟瀟落葉打孤村厚，一棹歸來日已昏。遠岫插雲微見影娟，濕煙貼水淡無痕。潮添錦纜寒逾重厚，香泛瓊卮酒半溫。悵恨故人杳不見娟，開奩空有斷釵存。厚

◆371〈懷浣香亡姊與厚安同作〉

瑤徽輟清絃，長抱人琴痛。魂魄歸重泉，處世同一夢。悲風折喬柯，黯黯愁雲凍。嗟我同心人，親愛過伯仲。長眠倏半載，杯酒誰與共。綠菴蔽空館，錦瑟不忍弄。棊几拂餘塵，焚香待歸鞚。寤寐不復見，臨風益悲慟。慘慘一燈昏，葳蕤花穗重。何處去尋君，心隨暮雲縱。

◆372〈夜窗對菊與厚安同作〉

黃花無語旁疏櫺，一穗寒燈隔幔青。風送幽香浮短枕，月描瘦影上圍屏。華因秋老情逾淡，人為愁多夢易醒。撿取瓶泉勤護惜，不教霜露怨飄零。

附錄：書前題記¹⁴

薌巖仁兄出示令先德故福建延建邵道文節公遺集，云刊本久佚，此林未甸兄乙亥年¹⁵遇之京市書攤，以歸薌巖者也。謹按《清史稿·列傳》書公遇難順昌為咸豐八年戊午九月十二日，而集中何氏〈序〉作於公遇難之後，題為丁巳秋七月。歲月舛差，疑不可解，薌巖亦莫能答。先曾外王父嘉興沈西雍公，道光丙午自廣平告休，居蘇州，後被命授福建興泉永道，以亂作道阻不得赴，旋病歿。蓋與公同官而不相及也。第七十八辛卯¹⁶上距咸豐戊午九十三年，後學勞篤文拜觀敬識。

韓昌黎稱其弟子侯喜，曰：「惟子文學，今誰過之？」然侯喜無文集流傳。錢南園澧以文章氣節著於乾隆時，洪北江亮吉先生評其詩如淺話桑麻，亦關治術，然不聞有遺集傳世。古今以文學著稱者中，其遺著散失消亡者多矣。北平袁厚安先生，抱高節，能文章。死難後，有遺集四卷刊行，顧流傳絕少。今行雲兄以先生《味梅齋燼餘草》見示，乃距今八十餘年前刊行於福州之初印本，得之北京冷攤者，蓋僅存之孤本也。敬為披讀，清辭麗句，卓然名家，可以傳矣。著清芬於百年以前，留遺集於滄桑之後。屬有天幸，蓋非偶然。行雲於寶藏之外，尚希謀為重印，以廣流傳也。辛丑¹⁷孟秋華陽後學曾天宇。

辛丑季秋樂至謝无量敬讀曾天宇代書。

宛平袁文節公，於道光丁未廷試以第二人及第。是科大魁，為南皮張文達之萬也。公既登上甲，聲華藉甚，為人所慕，摭拾流言，散館，遂改用部曹。後以道員分發福建署延建邵道，殉順昌之難，勞君篤文以《史稿》與何〈序〉不符為疑。按《史稿》係根據史館〈忠義傳〉，以予所知，傳寫舛誤往往有之。何廉昉為當時作序之

¹⁴ 按撰寫年代排列，未署年月者置於後。

¹⁵ 1935年。

¹⁶ 1951年。

¹⁷ 1961年。

人，不應有誤，當以序文為正。吾鄉用北籍應試者多，如寒家則占籍大興，袁氏則宛平。燕京在明初為北平布政使司，故皆稱北平也。公繼配同里左芙江夫人，詩畫雙絕。公之遺集刻于閩中，流傳甚罕，今其曾孫行雲世兄得此精鐫初印之本，足為青箱世守。愚堂嫂韻珊為公孫女，亦工詩畫。仰藥殉夫，旌表節烈，《史稿》有傳。茲拜讀遺集，謹題數語以志景仰。 壬寅¹⁸秋昆陵惲寶惠時年七十又八。

一日，偕和君教授過行雲兄宅觀藏書，出示其先曾王父厚安公《味梅齋燼餘草》，屬題，攜歸披讀一過，見集中「別婦」、「寄婦」及「題婦繪露根蘭」諸作，知夫人左芙江系出常州名門。左氏詩畫兼擅，吾鄉曾詠先生之夫人左冰如，即其同懷姊妹。冰如女曾懿、曾彥皆工詞翰、善丹青。懿著有《古歡室集》，彥著有《桐鳳集》，淵源有自，蓋世風華，想芙江夫人生平吟詠必富，名繪亦多，未知有無遺蹟猶存人間？此《燼餘草》因經兵燹，已成孤本，但有價文物往往晦而後顯。龍泉太阿，重出石函，倘留意訪求夫人遺著，或能遇之，再與《燼餘草》合刊行世，如天真閣、長真閣二妙流傳，寧非快事！讀罷，謹書所感歸之。

蜀人戴亮吉題。

¹⁸ 1962年。

· 更正啓事 ·

本刊第十八卷第四期「自我技術與生命機制：法語莊子研究專輯」共九處更正：

1. 頁 11 註 1：*Philosopher* 應作 *Philosopher*。
2. 頁 19 註 27、頁 140 第 17 行：*l'Enylopédie* 應作 *l'Encyclopédie*。
3. 頁 39 註 64：*in Gesammelte* 應作 *in Gesammelte*。
4. 頁 62 第 26 行：「對事喜的運行」應作「對事物的運行」。
5. 頁 86 第 15 行：*tautégroie* 應作 *tautégorie*。
6. 頁 112 第 20 行：*pitie* 應作 *pitié*。
7. 頁 113 第 3 行：*maitriser sans être maitrisé* 應作 *maîtriser sans être maîtrisé*。
8. 頁 116 註 3、頁 118 註 8、頁 119 註 10：*philosophique* 應作 *philosophiques*。
9. 頁 140 第 24 行：*présentés... l'encyclopédie des nuisances* 應作 *présentées... l'Encyclopédie des Nuisances*。